

14/07/2024

Aizawl

1830 Hrs

REGIONAL NEWS

HEADLINES:-

1. Kum 2022 atanga kumin April thla tawp thleng khan Mizoramah ruang 135 chhar a ni tawh.
2. Lawngtlai district bawrhsap chuan Myanmar buaina avangin ramri-ah venhimna khauh zawk kalpui a nih tur thu a sawi.
3. Prime Minister Narendra Modi-a'n kum 3 kum 4 kalta chhunga hna thar vbch 8 siam chuan eizawna tur awm lo ti a dawt thuthang theh darh a titawp a ni, a ti.
4. Zanin zanlai dar 12:30-ah Spain leh England-in Euro Cup Final an khel dawn a, naktuk zingah Argentina leh Colombia-in Copa America final an khel bawk ang.

<><><>

DEAD BODIES

Kum 2022 atanga kumin April thla tawp thleng khan Mizoramah mipa ruang chhar 126 leh hmeichhe ruang chhar 9 an awm tawh.

Police hotute hnen atanga thudawn danin ruang chhar zinga mipa 4 leh hmeichhia 2 chu tunge an nih hriat loh an ni a. Hemi chhung vek hian ruhro pahnih chhar a ni bawk. Kum 2022 khan mipa ruang chhar hi 60 an awm a, hmeichhe ruang chhar 3 an awm bawk a. Nikum chhung khan mipa ruang 46 leh hmeichhe ruang 5 chhar a ni a. Kumin January leh April inkar khan mipa ruang 20 leh hmeichhe ruang 1 chhar a ni. Kum 2022 atanga kumin April thla inkar chhung vek khan Mizoramah mahni intihlum 236 an awm a, an zinga 200 hi mipa an ni a, hmeichhia 36 an ni thung. Tunhma atang tawh khan mahni intihlum zingah hian hmeichhia ai-in mipa an tam zawk ziah niin Police hotute chuan an sawi.

Kum 2022 leh kumin May thla inkar chhung khan lirthei chesualah mi 266 an thi tawh a. Kum 2022 khan lirthei chetsual vanga thi an tam ber a, mi 117 an ni. nikum khan mi 96 thi-in kumin January atanga May thla tawp thleng khan mi 53 an thi tawh bawk a ni.

<><><>

PRISON POPULATION

Mizoramah Jail tang mi 1,782 an awm a, lungin thenkhatah tang awm thei tur zat bituk ai a tam an awm mek thu Prison Department hotute chuan an sawi.

Prison Department chhinchiah danin vawiin thleng khan Central Jail mipa ward ah tang 844 an awm mek a. Central Women Jail ah tang mi 165 an awm mek bawk. Aizawl District Jail ah tang mi 110 an awm mek a, Lunglei Dist Jail ah mi 153, Siaha Dist Jail-ah tang 78, Champhai District Jail ah 162, Kolasib District Jail ah mi 114 an tang mek a, Lawngtlai District Jail ah tang 27, Serchhip District ah jail tang 53 leh Mamit District ah tang 76 an awm mek in, vawiin thlenga Mizorama jail tang belh khawm hi 1,782 a ni. He'ng lungin tang belh khawm zing ah hian kum tling lo tang mi 18 awmin, hmeichhia mi 218 tang an awm mek bawk a, a bak mi 1,546 te hi mipa an ni.

Tun dinhmunah hian Mizoram tanina tang awm thei tur bituk ai a tam tang an awm mek a. Central Jail Aizawl ah tang mi 438 awm thei tura ruahmanah jail a leta tam mi 844 tang an awm mek a, hmeichhe

awmna Central Women Jail a tang dah theih zat hi mi 96 a nih laiin tun dinhmunah mi 164 tang an awm mek thung. Aizawl District Jail-ah mi 90 awm theihna -ah tang 112 an awm mek a. Mi 109 awmna tura ruahman Lunglei District jail-ah mi 156 an tang mek bawk. Tang 105 awmna tura ruahman Champhai district jail-ah mi 160 an tang mek a. Jail thenkhat a tawt viau laiin Siaha, Kolasib, Lawngtlai, Serchhip leh Mamit district Jail ah te chuan tang thei tur zat bithliah aia tlem jail tang an awm ve thung a ni.

<><><>

LAWNGTLAI LAW AND ORDER

Lawngtlai district bawrhsap Pu Cheemala Siva Gopal Reddy chuan Myanmar buaina avangin ramri-ah venhimna khauh zawk kalpui a nih tur thu a sawi.

Tun hnai a central Young Lai Association (CYLA) leh tlawmngai pawl dangte nen an inkawmhona-ah bawrhsap chuan tun dinhmunah Lawngtlai khawpui chhung ngeiah Rakhine State (Myanmar) mi leh sa an awm tih thawm a beng a thlen thu a sawi a. Pu Cheemala Siva Gopal Reddy chuan Assam Rifles nen hemi chungchang hi an sawiho tawh thu a tarlang a. Ramri khauh zawka venghim tura hmalak mek zel a nih thu sawiin, Police patrolling pawh zing leh khauh zawk a kalpui a ni, a ti. Tlawmngai pawlte ngenna anga 'Security Check Post' tam zawk siam chu thil pawimawh tak a ni tiin bawrhsap chuan thuneitu sang zawk hnena thlena, a tul ang zel a hmalak a ni ang a ti. Hetih lai hian CYLA hruaitute chuan tun hnai-ah Myanmar ram Rakhine state atangin Arakan hel pawl mite ralthuam kengin Lawngtlai chhungah an lo lut niin an sawi bawk a ni.

Bawrhsap chuan mipui nitin mamawh bungraw phur lirtheite chu mipuite mamawh phurtu ber an nih avangin an kalna tur hmun an thlen ngei a pawimawh hle a ti a. Mimal YLA hminga pawisa khawn duh vanga lirthei lo dang thin an awm ni a a hriat thu sawiin, hei hian YLA hming a tichhe thei dawn hle tiin CYLA chu pawisa khawn chingte zawng chhuak leh a tul anga hmalakpui turin a sawm a. A bik takin CYLA chu pawl lian ber an nih angin hmahruaitu ni turin a ngen a ni. Zalen taka sumdawnna a kal pawh tul hle a ti a. Mizoramin tuialhthei a lakna ber Assam lama lei chim vangin tuialhthei duh khawp hmuh a ni lo a, tunah chuan harsatna engmah awm tawh lo in Lawngtlai district mamawh zat tuialhthei a awm mek tih a tarlang.

Pu Reddy-a chuan Myanmar leh Bangladesh ram buai vangin Lawngtlai district- ah raltlan tam tak an lo lut tih a tarlang a. Ramri lo kan te chu raltlan an nih angin a theih chin chinah tanpui thin a ni, a ti a. Tlawmngai pawlte pawhin theihtawp an chhuah tih a hriatpui thu sawiin, fimkhur taka hmalak erawh a tul hle a ti. Ram leilung fate him leh zalen taka an awm chu thil pawimawh hmasa a nih thu tarlangin, raltlan chungchangah ngaihtuahna thuk zawk neih a tul rualin tlawmngai pawlte nena lungrual taka thawhho pawh a tul hle a ti a. Lawngtlai dsitric chhunga raltlan awm mekte nawr chhuah tumna engmah a awm lo tih sawiin bawrhsap chuan a hranpaa sawrkar atanga raltlan tanpuina a awm si loh avangin raltlan tam zawk lo lut tur erawh district mipui-in an dawl zo dawn lo a, an dawl zawh tawh hriat a tul hle a ni, a ti.

<><><>

NE MISSIONARY RETREAT

Ningani atanga Bawngkawn Presbyterian Kohhran Biak Ina Synod Mission Board buatsaih North East Region Missionary Retreat vawi 5-na chu zanin hian a tiak ang.

Retreat Thupui chu 'Chanchin Tha hril' tih a ni a. Retreat-ah hian chhun lamah mithiamte thuziah zir ho leh rawngbawl zelna tur atana thil pawimawh hrang hrangte zirho a ni a. Rev. Dr. K. Lalrinkima, ATC leh Upa Dr. C. Lalhrekima, Mission Veng te ziah zirho a ni a. Zan lamah Vantlang Pathian Biak inkhawm buatsaih thin a ni. Ningani zanah Synod Senior Executive Secretary Rev. C. Zoramawia'n Keynote Address a sawi a, Zirtawpni zanah Executive Secretary Rev. V.L. Luaia Hranleh-in thuchah a sawi a. Inrinni chhunah inhlan tharna leh fakna inkhawm buatsaih a ni a, zanah MTC Principal Rev. Dr. C. Lalramchhana'n thuchah a sawi a ni.

Vawiin chawhma inkhawmah Synod Executive Secretary Rev. Dr. K. Lallawmzuala'n thuchah a sawi a, chawhnu-ah Synod Secretary Rev. P.B. Mankima'n thuchah a sawi a, chatuan ram pan ta missionary mi palite sunna hun hman a ni. Zanin hian Mission Board Secretary Rev. R. Lahmingsanga'n thuchah a sawi ang a, inkhawmpui hi a tiak zui ang. Retreat chung hian inkhawm ban apiangin zaikhawm hum hman thin a ni baw.

Tun dinhmunah hianhmarshak bialah Mission Field pasarih - Barak Area Mission Field, Tripura Mission Field, Karbi Anglong Mission Field, Arunachal & Assam Mission Field East, West, North leh Assam Mission Field te a awm a, missionary 612 an bung mek a ni.

<><><>

CYMA AID

Central YMA chuan nimin khan Beraw Tlanga Manipur raltlan hnuchham enkawlnaah tanpuina ei tur leh mamawh dang Rs.50,000/- hu an hlan. Tunah hian Hnuchham enkawlnaah hian naupang 24 leh thawktu 4 an awm mek a ni.

Hei bakah hian Central YMA chuan Cherhluna Myanmar raltlan chungkaw 21 te tanpuina cheng nuai khat chu Sub- Hqrs YMA, Hnahthial kaltlanga hlan turin ruahmanna a siam baw.

<><><>

CHAWNGTE NGO

Chawngte-a tlawmngai pawl hrang hrangte chuan an harsatnate ngaihthaha puhin minister pathum laka an lungawi loh thu an puang.

Nimin khan Joint NGO Chawngte inkhawm koh a ni a, hetah hian May ni 8 leh ni 9 a Health Minister, PWD Minister leh Home Minister-te hnena Chawngte khawtlang harsatna leh mamawh an thlente, thla hnih hnu-ah pawh chhanna an la hmu lo chu hriatthiam har an tih thu an sawi. May 8 khan Health Minister hnenah Chawngte CHC a MBBS pakhat leh X-Ray Technician awm lo chungchang leh, hriselna kawnga an khawtlang hmasawna tura thawktu dang indaih lohna te thlen a nih thu inkhawmah hian sawi a ni a. Health Minister hnena thu an thlen hnu-ah Health Department hnuai a Doctor 35 lak an nih tawh lai a Chawngte CHC-a doctor an dah ve lo chu he hriatthiam har a tih thu an sawi.

May 9-a PWD Minister hena Chawngte khawchhung kawng siam mek chungchang an thlen chu an beisei angin tihhlawhtlin a la ni loh thu an sawi bawk a Home Minister hena Chawngte Police Station a thawktu indaihloh dan an thlen tawh thu leh thawktu dah belh chu sawi loh, constable awm chhun June 25 a sorkar in a sawn chhuak chu an khawtlang zahlohna-ah an ngai tih inkhawmah hian an sawi bawk a ni.

<><><>

PM ON CREATION OF 8 CR NEW JOBS

Prime Minister Narendra Modi-a'n kum 3 kum 4 kalta chhunga hna thar vbch 8 siam chuan eizawna tur awmlo tia dawt thuthang theh darh a titawp a ni, a ti. Tunhnaia RBI report tihchhuah tarlangin Pu Modi-a chuan skill development leh eizawna chu ram mamawh a ni a ti a, hemi tihhlawhtling tur hian a sorkarin hma a la zel a ni, a ti.

He thu hi Mumbai khawpui daifem, Goregaon-a cheng vbch 29,000 hu project chi hrang hrang a hawna-ah a sawi a ni.

<><><>

EURO FINAL/WIMBLEDON FINAL

European Football Championship, Euro Cup final chu zanin zanlai dar 12:30-ah Spain leh England-ten an khel dawn a, Euro-ah Spain hi tum 3 an champion tawh laiin England erawh tun hi a zawna tum hnih final an luhna a ni.

India ram sanaa naktuk zing dar 5:30-ah Copa America Football Championship final khelh a ni dawn bawk a, Argentina leh Colombia an inkhel ang.

Hetih lai hian, London-ah nichin lawk khan Wimbledon Tennis mipa singles final khelh tan a ni a, vawi 7 champion tawh, Novak Djokovic-a leh champion lai Carlos Alcaraz-a ten an khel a ni.

Nizan khan hmeichhe singles final khelh a ni a, Czech Republic mi, Barbora Krejcikova-in Italy mi, Jasmine Paolini hnehin a champion a ni.

<><><>